


# 舊堂集

義

gift  
NO LONGER PROPERTY OF  
HARVARD-YENCHING LIBRARY  
HARVARD UNIVERSITY  
2 DIVINITY AVENUE  
KR  
AUG 31 1970

書疎





Digitized by the Internet Archive  
in 2018 with funding from  
University of Toronto



舊堂先生文集卷之三

疏

擬應

旨疏 乙卯

伏以臣等竊伏見三月二十五日 聖教頒下者十行

絲綸警懼惕勵憂懇惻怛反躬求助之教不但延訪大  
臣而遍問於在朝庶僚不但問于在朝而至及於草野  
韋布之類臣等與山野父老扶杖聽 教莫不感激流  
涕曰我 殿下寅畏修省之意如此之篤 側身俯詢  
之誠如此之切臣等雖伏在遐陬蔑無知識猶是食  
殿下之食衣 殿下之衣今日之矜青髮白者莫非我



殿下培養中物耳苟或有一分蘊蓄于中而不思所以仰答如渴之聖者則是忍負我殿下生成之至恩也臣等豈敢曰我殿下臣子乎嗚呼蓄異之作夫豈偶然哉臣等聞天之與人一理無間感應之妙捷如影響以善感之則和氣應以不善感之則乖氣應其理甚明不差毫髮故自古聖帝明王莫不嚴恭祇畏小心翼翼者蓋慎所以感之也臣等竊伏念殿下卽祚以來一心敬天不敢遑寧雖帝堯之欽若大禹之憂勤殆無以加之則究厥天理宜其和氣感應吉祥滋至而是何天災時變無歲不作式月斯生方春無花之災已乖



常理滛虹下陽之變尤極驚懼嗚呼此曷故焉臣等不  
敢知政令施措之際文飾或勝而實功之未盡歟中外  
上下之間奢靡太過而節儉之不足歟朝著之上傾軋  
成風而無一分寅協之氣象州縣之間貪酷成習而浚  
萬民疲瘡之膏血和氣日損怨氣日積有以致咎徵之  
疊見歟臣等又不敢知 殿下睿德非不至大至盛而  
普施博濟之澤猶有所未盡下究歟 殿下聖學非不  
高明光大而涵養本原之工或有所未致中和歟抑亦  
上天之仁愛 殿下有如慈父之愛子而故示以一時  
之譴使之警動 聖慮益加勉勵者耶雖然此則在朝



之言責諸臣想必極言而竭論之矣惟在我 殿下之  
採取而力行之如何耳臣等不必更事煩聒而臣等竊  
有區區秉執三十年如一日者請爲 殿下剴瀝而陳  
之嗚呼我 殿下近日遜楊之教章奏之批每以不敢  
言不忍聞六字申申 教詔臣等雖無狀亦 殿下之  
臣子也 殿下之所不敢言者其何敢復言 殿下之  
所不忍聞者其何忍復提而第伏念撐天亘地不可一  
日而不明者惟此箇義理也 殿下若以不敢不忍而  
禁防其義理之言爲臣子者 以不敢不忍而不復進  
義理之言則竊恐時月漸移一線義理之寄在天地間



者一仕漫漶終不得以快明於斯世而天下萬世之憂  
將有所不可勝言者矣臣等又焉敢曰不敢言不忍聞  
而一向泯默不言於今日而更待何日乎茲不獲已冒  
死號顙伏願 殿下誅其罪而察其衷焉嗚呼臣等頃  
於壬子夏敢將咫尺之書再陳黻纘之下當夜面 諭  
及兩度 聖批無非哀痛惻怛之意而至於 天顏悽  
愴 玉音嗚咽繼之以念念闡揮之 諭臣等淚抱  
聖旨退伏鄉里每向西天日夕恭俟者庶幾因此而有  
大闡明快昭晰之日矣果於癸丑八月 徽寧殿金騰  
寶誥煥然始發於數十載之後嗚呼悲夫上二句八字



之中而出天之 睿孝昭著無蘊下二句十二字之中  
而悼痛之 聖意瀉盡無餘至於當時讒賊輩之凶腸  
逆肚固不畢露莫之敢遁於二十字言意之表則 先  
大王所以密密秘藏以遺來後者安知非有待於 殿  
下今日耶然則在金縢未發之前則 殿下不敢道之  
教雖出於至敬至謹之至意而在金縢既發之後則今  
日義理已判然而自別矣夫天下之義理無窮聖人之  
用中隨時是以先賢文字有初晚之不同則必以晚見  
爲定禮家之說有先後之不同則必以後出爲準然則  
今日之一副當大義理其不在於克遵 先大王遺後



之睿旨耶臣等謂殿下之嚴懲討明義理者只是  
體遺意而已述先志而已更何有一分未安底道  
理而奈之何金縢之發已過三載上未聞昭告太廟  
以聞兩朝之德美下未聞頒示八路以彰諸賊之罪  
惡日星義理尚在明晦之間神人痛恨尚在泄鬱之中  
人情之抑鬱如是則天心之不豫固理也人心之痛恨  
如是則天氣之不和亦理也然則天災時變之層生而  
疊見者是果偶然乎哉嗚呼三十餘載之間烈旱淫霖  
日蝕地震冬雷夏雹赤子黃糴等妖異之蓄殆無虛歲  
而至於今年虹貫之變而極則上天譴告之意抑必有



所在耳嗚呼前年何年今歲何歲星霜荏苒虹流之華  
甲己周曆象循環冊禮之舊辰重回 聖孝哀慕之懷  
臣民掩泣之痛昨年而百倍今年而又萬倍矣罪人之  
非不斯得而顯戮之典則未加讎賊之非不誅鋤而聲  
討之舉則未行神人憤鬱之恨尤切於昨今兩年則其  
所以感於下而應於上者雖欲致和氣之於鄉壤其可得  
乎然則爲今日答天譴之道惟在於快聞 兩朝之德  
美亟行 天討之嚴典用春秋正名實之一大王法者  
正今日不得已之舉也春秋傳曰凡讎逆者殺之不以  
其罪則不以討賊之辭書之其所以垂戒天下示讖後



世者不亦嚴切而著明乎夫春秋者聖人之權衡百王之法度也竊伏惟一部春秋已具於殿下方寸之間而若於清閒涓鑊之暇更加熟複精察之工則其於天理人彞間義討賊之處殿下義理中精微必不在於不敢道不忍聞而權衡法度森嚴昭著自有所建天地而不悖質鬼神而無疑百世以俟聖人而不惑者也嗚呼臣等雖至愚至微每於靜夜無寐之際仰念殿下之苦心至痛則自不覺心肝俱裂血淚交下豈不知殿下於此箇義理講磨之已熟精辨之已審也然春秋之名實未正則凶魁奸孽雖剗殄滅之無遺類至於天



地之大義則猶有所未盡伸也然則 宮廟瞻覲之禮  
園寢奉護之節凡所以寓羹牆之慕致哀敬之誠者靡  
不庸極而臣愚死罪竊以爲猶屬第二義也子思子曰  
惟天下至聖爲能聰明睿智足以有臨也寬裕溫柔足  
以有容也發強剛毅足以有執也齊莊中正足以有敬  
也文理密察足以有別也今我 殿下以聰明睿智之  
聖溫柔之德中正之敬密察之工固皆兼有而盡美矣  
而獨於發強剛毅處終有所未盡竊不勝爲 殿下惜  
之臣等草莽之士也與在朝者有異雖不能一一的指  
其某賊某罪而竊惟國史所載班班可考今日之請不



過舉以春秋之義而正其名實嚴辨忠逆顯加懲討因  
他罪而已辟者明其爲某年之凶賊未伏法而已斃者  
追施以某年之逆律在黨與而未治者治之以某年之  
干犯當孥籍者孥籍之當廢錮者廢錮之大則痛拔根  
柢小則剪剔枝葉因以載之冊書決成一案特奉金騰  
寶誥上以明告於太廟之列聖下以頒諭於八域之  
臣民煥然昭示我先大王止慈之聖德先世子至  
孝之純誠則殿下述志追孝之道不但永有辭於萬  
世天下夫如是則先大王在天之靈必說豫於冥冥  
之中者當如前日之聖教矣先大王旣說豫於冥



冥則先世子之靈亦豈不說豫於冥冥乎先德既聞  
睿孝既彰則我殿下窮天之根庶可得伸而  
聖心之悅豫尤當何如哉夫如是則爲今日臣子者上  
自朝廷下至閭巷凡戴髮含齒蠢動血氣之類夫孰不  
懽欣和悅自在天地和氣之中也所謂心和則氣和氣  
和則天地之和應之者自今日復見而反風歲熟之慶  
亦必如周家啓金縢之日矣臣等愚妄之見則以爲近  
日之妖灾若有所崇於義理之未伸今日之弭灾意必  
無過於義理之快伸故敢瀝丹血冒死瀆顙重未免貽  
戚我聖心臣等誠死罪也語極重大不敢縣道投呈



千里是足應 旨晚時臣等又死罪也臣等無任忠愛  
悒鬱激切兢戰之至

書

上小山先生李公

光靖

三陽回泰伏惟道體對時萬重鳳山追享時奉安文字  
特賴鄭重一言以貴斯文盛事鄙鄉士林之感當何如  
第起送儒生之際兩賢文蹟之可考者多遺棄不得備  
覽於東筆之下以致記實處或有一二闕漏而欲為往  
復稟議則日期已來其勢不得矣會中僉長之議以為  
傳後文字不可不備實而若避血指之嫌不為補漏恐



非吾黨相悉間事也再三強託於上舍從叔故辭免不得就其本草中不無數三句商量添改處而以卽日奉書趁謝未安之意申託於畱院諸儒而歸近始聞知咫尺一紙尚未得奉致門下極驚極悚不覺駭汗沾身文字旣出長者之手則一字添減實涉未安或有不得已商量處卽告厥由恭俟可否固道理也而况不佞適忝有司之任以鄙名奉請則經事後闕然不報若無嚴畏者都是不佞之罪雖費辭自文何敢望見恕於長者門下哉雖在晚後不敢不告謄出本草中所改處專人仰溷兼訟不敏之罪若特垂警誨無置遐棄之域則不佞



之幸

上樊巖蔡相國

不意宅揆大人強屈威尊特垂勻慈丁寧反復滿幅誨諭無異父兄之教子弟生等嶺外小儒也昧事愚妄之行何以獲闢崇聽所以眷愛而憂憐之者至於此極也謹伏審仲夏句體動止萬康區區伏慰無任下誠第茲生等今日之舉是豈爲強執私見徒事瀆聒之意哉蓋自士子疏後義理之端緒雖發而義理之本柢終未快明我東臣民何嘗一日而忘于此也生等豈不知我聖人苦心血忱常在此義理精微處而乃者金騰書旣



出之後其精微處又曉然無疑矣然而側聽屢年 乾  
斷尚遲日星義理方在晦明之間興情之抑鬱當何如  
況當災異修省之日惻怛求言之教至及於山澤韋布  
今日臣子之所欲言者此箇義理外孰有大焉生等淺  
見則今日正是可言時故一道父老之所垂涕而送累  
十多士之所畏足而來者此也而及至入城則物情時  
議大違所料皆以反害本事爲言生等以是驚懼遂未  
免掩泣出城而中途遲遲費盡永日退伏江郊無意踰  
嶺俯教一箇時字又申申貽戒允出赤衷生等於閤下  
之教敢不傾心欽服但自古草野狂妄之言只出於忠



愛所激而已何敢望君父之必納耶若以吾君之所欲  
聞而後進言則不過承順上旨是豈爲仰報培養之  
聖恩哉臣子所進言正看得義理如何今日愚忱只  
是有進二字耳雖然始伏聞聖候當此月連御湯餽  
云此時貽憾之萬萬未安誠如下教雖經月踰時固何  
敢汲汲耶謹將咫尺敢敷心肝極知猥屑無所逃罪伏  
乞爲國自愛加護鼎食以副蒼生之望

答鄭士仰

方求賢側席之日固知吾兄必不得終老於林下柏府  
新除果蒙禮擢之恩吾黨光寵已無可言而亦可



以爲朝廷一賀也。昨自漁軒忽拜意外寵翰，於喜不寐之餘，因審涼秋靜中，道味增重，尤令人十分慰悅。竊念君子出處之分，如飲食裘葛，惟當自知寒暖之宜，而但欲起則或泄，於自輕；欲卧則又涉於自重。此箇輕重最難審量，而想必聖意傾注寵遇之禮，頻繁不已。雖欲固守東崗，畢竟恐不可得。未知盛意將何以報塞也。辭章體例，先生集中自有柯，則何必俯詢於山澤散人耶？爲今日臣子者，鮮能知敬君之道。若以孟子莫如我哉王之訓爲事君第一義，則庶不負吾兄平日所學。以是區區沐洙垂暮殘年，始覺親勝己資，警益之爲可樂向。



日相對時果以旬餘日對山樓上從遊之意丁寧奉約  
矣爲老炎所鑠素患阿睹一倍作苦至於兩睫赤爛長  
合不開跨驢出入其勢末由竟未免食言之歸甚愧大  
信不約之意也出於下策六七日避暑齋菴者心經數  
三遍方看時不無意味好處一下山之後無端滾汨因  
付相忘之域有若漏器之水都無痕跡有何一分所益  
良可悼歎不待勤邀合有相悅之賀而所苦如右無計  
致身益愧相與之意豈可望浚恕耶

答鄭士仰

近多人事之撓無閒靜時日憧憧一枕惟有同人之思



而無由致身於泉聲岳色之間以之聽瑤琴而討心契  
意外賢允惠然來顧因袖致寵札謹審靜養道味增相  
欣慰區區沐洙前月靜窩叔父衣冠出世因復求閔子  
姪安仰之痛益復如新而今當中月之丁以孤孫之持  
父衰不得依禮行禫虛度是日亦有所未忍略以饌品  
只依朔望奠儀而止於禮得無徑庭杜撰之失耶前所  
委懇之事非不日日圖之而不但疾病事故種種絆掣  
昏惰之性振作不得尚此遲延私情之緊重處猶且如  
是則他事又何可論早晚將抱書一進以伸前請爾侑  
觴文字苟非中心藏之何能費損精思及此奠哭之日



耶况辭旨鄭重歷舒終始記述備至子姪感泣當何如  
伯高病中使芻草成遺事一通從後當奉呈若復惠珍  
重一言則尤當使伯高魂感泣於地下矣賢允言談舉  
止比前益老成面目自別賢父兄教方可知尤令人歎  
尚

與鄭士仰

各當衰暮出山八山俱非容易事所懷仲人貽阻至此  
有時瞻望林庄只令人惆悵不樂耳積暑餘天氣涼高  
未審燕養道味增重沐洙春夏以來連哭至親門族中  
六七喪慘八秋而又遭門大老喪私家梁木摧斲已盡



餘生之痛可勝言喻重以自家衰痺逐年轉深素患阿  
睹中間幾成全盲近以輪回泄嘔又經一番風波見今  
精神筋力奄奄若泉下人自憐奈何向來面懇文字事  
已經數年可能記得否百事頽惰爲親重事稽遲至此  
不孝誠薄舉此可知以是之故鄙家事自多未遑自曾  
祖以下三世闕狀古人不仁之戒尤切愧懼今玆涼生  
後大擬振作將抱若干遺稿躬進案下復申前請顧今  
病勢末由自力替起家第敢乞一言之重或可矜恕衷  
情耶專恃契厚之誼累世文字一時並請固非道理而  
年來斯文宿德凋零已盡環顧當世任此秉筆之責者



惟老兄而弟亦餘日無幾衰病寢淡若一朝溘然則秘  
篋遺草畢竟湮沒後已自揣多病殘骸將未免不瞑之  
鬼茲敢不避唐突縷縷不已幸望狀碣間各垂珍重之  
惠副此病友之望千萬切懇高祖考年譜一冊竊欲一  
番經閱於座下並爲呈上而表狀則已有前輩所撰卷  
首數語亦或不慳則其爲銘感尤當何如樗翁近有所  
示耶月初來鄙所知弟有此行約以日間相會于對山  
樓上以爲鼎坐團話之計弟行不成此友恐虛勞矣可  
恨吾輩此約可謂積有年所而終始不諧追隨好朋友  
一日講討之樂亦有數於其間耶近日學子之從遊者



幾人其中亦有篤志好學才氣英邁有可與進就者耶  
吾黨之望惟在老兄及樗友更望勿謂已到高明之域  
而益致於高明勿謂已臻精微之處而益盡其精微不  
但成已而推以成物使斯道之傳不至墜絕益切區區  
如弟已虛枉一生今雖夜夜秉燭趲程趁限斷無閒道  
之望况病暍小開輒酸全廢書冊近得朱子書堆卻塵  
床已過三序而尚未窺一兩卷子自料昏醜之物終爲  
賢友之棄悼歎奈何

與鄭士仰

近日蟬聲益清懷仰高風第不勝憧憧之思未審向時



山口痘疹果止於起處而閒燕起居一向清健春間一  
進葢出於宿素經營而樗翁家憂報時恒覺惱無以致  
相邀團圓之樂故未免悵然徑歸客俟少隙擬酬未盡  
餘債自初夏痘起村末延拖過三夏不熾而亦不息一  
帶愚溪因作弱水矣損友之得親勝已從容聞警發之  
益固命數所關耶樗友所遭令人氣短吾黨如此少年  
不易復得此者固可惜而其大人豈宜遭此耶因希爲  
唁歸聞其動靜則能以理自寬對人酬酢如平日云益  
信其學力不誣矣然強制於外者未必不致傷於內幸  
於書牘間申申奉勉如何沐洙年益浹而氣益懣今夏



尤不能耐暑前月遁入齋庵過半月而歸惟幸無甚外  
撓時以殘書遮眼而其於漏器何哉曾考記實之文向  
蒙盛諾其間或復畱念否幸藉大人之手連成三世文  
字得以爲異日不朽之蹟者已極銘感而眞珠寶惠又  
足以洞澈泉路則弟之所以有此瀆冒之請者只出於  
感激知遇之眷不顧狼屑之嫌兄之所以繼垂嘉惠之  
意者亦視同一家之事特恕僭瀆之罪而第念此等記  
序之役勞攘衰暮精力自不少區區憂悶之餘繼之以  
悚慄不安前所已成之文久畱清案果反復披閱更無  
字句間商量處耶鄙家方收聚各派誌狀合成一冊聊



以爲一部家乘使後世子孫有以徵古家文獻之資所  
懇文字若已草成因便付送如何

與南宗伯

漢朝

獲接賢器可愛其雅度克肖因詢審靜養起居增重閒  
居意味日新仰慰區區沐沐自家舊習依舊纏繞濯去  
不得新年所得只是一碗湯餅愧歎奈何向論自慊義  
非謂已見必是一場問難只欲求正於知者方賴賢友  
垂憐至錄朱夫子正論轉示愚妄使迷惑之見一番開  
破始覺朋儕間逢場暫論討有益亦多可幸可感今以  
惡惡好好便是自慊非謂必如此而方能自慊之說看



之則前日鄙見果違朱子之論而以本章朱註中自慊只是爲善去惡只是快底意方是心下滿足之說省之則朱子之論亦似彼此不同參看兩說疑晦終不快露迷見終不快足是皆自家心目終坐麤泛不能精察明辨之故若更爲論示警發昏塞則其感尤何如但凡看聖賢說話當先求吾人心上以爲體驗然後可見實理所任故鄙見所以以自慊爲心上快足者如此也而子希說必欲去其心意直以好好惡惡謂之自慊其間若不容一心字賢兄亦以此說爲然以本章此之謂三字話意看之其說似不背而但快足好意象一切偏枯無



着落處此則終不能無惑也自顧平日無此一邊工夫  
偶然一論便同娼兒禮佛必不免見笑於識者可愧

與南宗伯

向者子希歷拜而歸爲道尊旆將出山參道院講席故  
要爲盍簪計撥憂勇赴及到會所雖得奉接賢允暨子  
皜昆季而但恨兄不踐言使孤此躡塵之望也春事尚  
暖伏惟靜養起居益保重沐沐年來無限虞憂周而復  
始有若直了又元從姪幾死而生姪女幾危而甦身方  
奉老母迸寄在村寓苦憫何喻今省之會甚是盛事長  
少之集至過五十而迭相問難間以勉戒多有可觀若



使此事不廢則庶幾吾道南矣豈非大幸耶如賢友及鄭士仰素有問辨之工者置之此席所以資益於諸友者又必不止於此而既使兩翁靳動精辨如子高者又先歸好事之難圖果如是耶賢允不但儀度已老成所對講目能得吾儒家意味爲之奉賀第則本來心塵每看文字只看其粗未窺其精故往往論說輒爲精察者所詰爭而迷晦之見或不一一屈服自愧執謬終成其病根奈何戒懼章不覩不聞鄙見則謂之專指靜時之工而諸論皆以爲兼動靜說多以先輩說話爲證未知鄙見都沒理會而然耶鄙見亦非動時元無戒懼之工



以爲此章戒懼則專指靜時工夫未知如何兄見亦已  
聞悉而猶未親承幸明示破惑如何

### 與南宗伯

頃修一書將付循叟去便巧值違繯循叟歸有勤摯惠  
訊而弟亦時有仁漆之遊未卽承拜彼此替面之計乖  
張如是悵懷一般而弟心則歉恨尤甚卽茲春事向闌  
伏惟棣履起居與時同泰近日閒居所樂何事審辨密  
察之工益精熟耶沐浴作月塢行宿畱數日迺歷幾處  
知舊家到處團討可謂衰境一勝事而但馬病中途行  
李艱關素患阿睹十倍添苦合曉歸臥全不得披對書



字心與目俱入於大霧中只有沉痾晦塞之歎而已奈  
何負約之愆前書中已略陳區區不必更提而朋友間  
失信是豈小事耶我實負兄兄有何咎而滿紙自引至  
於此也前秋果以作事無有如何之意茫然相勉矣相  
別數月未免自犯於大如何之境足可見自家言不顧  
行處一心愧懼何敢曲爲自文計耶因此一事可見百  
病根源若蒙更加針砭不至遐棄則甘幸可勝道院講  
會間以儒生之薄罰不無譏貶之論似有不成之漸此  
亦關係吾黨運氣奈何

答南宗伯



頃聞清旆自海山歸稅益令人懷仰高風每擬一挹滿  
袖烟霞而恨未得翩然以致意外清幅忽墜寒齋寥索  
之中披讀驚喜不啻有隕自天仍審涼秋靜履起居清  
相仰慰區區東巖丈喪事竊想從遊之久傷痛當何如  
吾黨文丈次第零落斯文運氣漸迫陽九嗟悼奈何愚  
山陞臺吾嶺百年後初有事爲朋儕者豈但喜不寐而  
已疏 批又承華褒賜祭之 命至及於文莊先生恩  
禮殊絕慶幸可勝但本孫鮮少凡節想多窘蹙是爲可  
憫也仍念此翁一生林下所養有素所學且優必不負  
我 聖上知遇之恩而重名之下一世之所望亦重還



不無任大之憂耳沐浴今年所遭都不欲提說而金甥  
之芳年夭逝尤是可惜其家已無可言而顧此老境情  
况常作不佳慟矣奈何雖然此則天實爲之非人力可  
免而若自家行止則權度在我向來一着未免昧時輕  
動畢竟貽羞一道傳笑八方自己狼狽固不足恤奈何  
大抵弟性雖合下自懶於此義理痛鬱激憤之氣素所  
蓄積而宿留除去不得適當求言之日我東方臣子  
所欲言者無過於此胷中之秉執如是故所謂有所二  
字作一病根不暇審時度力不敢苦辭回避以致此擔  
不起之歎俯教中失在於始者真是良砭不覺拱手自



伏耳但往往不近之誚入非我也不知我心何必屑屑  
分疏也爲今之計惟欲閉門益牢省愆省事庶幾不復  
陷於大過而今夏眼苦倍甚於前無以自力於古人觀  
翫之工有何一分所得耶只自撫躬而已聞金剛遊錄  
甚清富朋友間往往傳誦何不一播咳唾餘瀝以滌此  
間俗累也前月洪孟謙欲追吾兄壯遊委來鼓動而顧  
此塵累自知無分於仙山不能奉諾洪兄行亦未免中  
寢兄之勇脫塵白益可見超然然每事不當躡等先從  
小者近者以爲循序之漸似合於自家小力量故欲以  
今重陽攜得六七儕友約上甲長頂上未知此計可遂



否異日者若搜得吾兄橐藏一番過眼萬二千峯不待  
一筇之勞而可臥遊矣

答南宗伯

兄不肯出山弟不得入山相阻不知幾日月瞻詠常憧  
憧循叟回袖致龍翰滿幅辭省鄭重勤摯無異一席穩  
晤日來寒候甚緊未審靜中起居對時珍護否沐洙月  
內次第過讎日霜露之感又重以怵惕此時情事豈有  
一分惛况素患阿睹去益添苦兄弟相對便成兩瞽尤  
可自憐講會事頃於鄉禮時兄必貴臨故擬將消商而  
竟孤所望每欲奉書一議而因循未果承此盛示秋冬



間有一開函席之計吾鄉儒士庶幾自此興起敢不樂  
爲之贊成耶向時每緣供億之難辦率不過一場諷詠  
而止徒勞無益果如所教若得料理物力以成六七日  
之會盡帙講討則豈非甚好而但念院力灾年益蕩無  
別辦供億之勢不勝惘然鄙意則諸生之供各自畱念  
或自本塾及門內助送似好而此亦必有難便之端奈  
何若因此拘碍會者零星則雖可慨恨苟有誠心爲已  
之工者亦必有處之之道幸望預定期會於某間勸習  
一表書必成吾黨盛事如何冬內則日寒難於開坐軒  
上當俟春和然後可以設講而誨弟任名已久有從近



逆退之計其時當主席未可必而末席參聽則兄弟皆  
有意耳關東錄一番奉翫萬二千峯羅在於几案間弟  
之卧遊反有勝於兄千里奔走之勞以是自誇細審所  
錄多有據理滌陋之功所詠亦有裨補世教者益欽平  
日眼目隨地真實不但翫物而止也鄭臺縣職雖非鸞  
鳳之棲而想不負 聖恩賢友在近亦必多強輔之益  
朋儕之望自不得不深也

答南宗伯

桑榆夕陽中又見歲色薄暮一心之憧憧往來者惟是  
朋從之思而恨不能得意外手墨忽墜於杜門寂寞之



濱信知良友亦有一般所懷也仍審臘寒靜履珍重仰  
慰不已沐沐所苦眼睫種種赤爛閉合度日案頭古紙  
幾至塵淡一寸悼歎奈何愚山翁小縣本非鸞鳳所棲  
得脫樊籠快適當何如歸後不知有何事端而世路之  
險元自如此奈何講會通文未聞輪回後鄉議然自是  
吾黨好事自當有樂爲之同聲者雖或有不應者何必  
一一引勸盡爲響應然後乃可設行耶鄙塾則修送講  
案至於數十而使之各自裹糧然未疲居多似不得齊  
進可憫東遊錄反覆愛翫累月未已推索至此不得已  
奉還而眼前萬二千峯倏忽捲去殊甚悵悵黃生達休



曾識其人否向來以中庸鬼神說及形氣圖說來示窮理自得實爲可奇而但無師受處所爲說多有可疑故有所往復子希亦爲一通辨說以示近者有覆書而累幅辨難其說不窮橫豎直倒有若抽絲瀉水其見之精不精決不涖姑勿言以渠地處況居僻村潛心獨得乃能慕古人之學而求古人之遺緒者可佳可尚希弟又爲一統辨說故姑畱於此中而自家眼目甚不分明未得折衷兩說作究竟法殊可歎也子高所見想益精到而緩用亦晏相耶柳川則痘火方大熾與子希累日相阻循弟則方讀書山旁耳



與南宗伯

夏初坪城康君歷致手札而無回便未謝頃於循叟行  
欲修付又未及使良友情牘虛辱塵床已過三月而闕  
然不報雖緣無直使往還若有誠意豈無討便之路耶  
頽惰不懇篤甚矣良愧良愧卽茲旱炎靜中興處隨時  
晏重觀書翫理意味日長三伏外火必不敢侵及於北  
窓高臥之趣爲之潮慰不已康君弱冠妙齡能有向上  
意思遠遊百里之外勤做冬春工夫其志尚可嘉况其  
進退應對能知事長之禮尤可奇歎聞書社從遊者稍  
進云其間才氣英豪者幾箇而謹重沉潛可以守而不



失者亦幾許幸望隨才善導有所成就使吾黨將來不  
至寂寞如何沐洙春間經歷至今頭骨頽洞殘年瘁質  
尤怕老爰喘喘茶茶長伴一枕一日間昏倒不省人事  
者輒過數次此莫非平日自持全無莊敬之工故也若  
使如兄強輔者在傍提醒豈敢安肆日偷之至此耶愚  
山之約終不得一踐春夏則主人有所戒勢不得圖成  
而秋生不遠矣菊黃楓丹時節亦豈非閒朋友追逐之  
日耶老矣旣不能讀書近日至願惟在以身側於賢友  
之間聽得好說話要爲李初平而此亦未易得良可痛  
歎日前希弟自南村又轉而西將拜愚山老友因向軒



下其行果得達而亦復從容討論耶此弟頗聰明有才  
識故窮格處必欲究到極細密之地而不肯平地上討  
得看文字往往有過苦強索之病而既不孜孜於舉業  
又不得慥慥於實學恐未免半上落下之歎如弟言則  
不尊不信而如兄師友之言則必樂而聽之幸望細加  
規勉如何近得新刊屏谷集一兩閱翫則學問純而正  
文章順而達真可謂後學師準而清修之操篤實之工  
俱令人欽服不已一冊想到清案果一閱否天旱何故  
致災如此晚雨後所插旋即龜圻立秋已過而餘望已  
斷生靈將盡劉後已耶一已一家之私非所可論而竊



伏想九重深處堯舜病諸之憂庸有其極乎野老憂國之忱自不得不耿耿耳講會將以秋涼後設行耶凶荒比甚或有以不遑為言者園城中尚有絃歌今此父象若過一番荒歲則人情物態可想其日八於沉沉世界更不知講誦之何事須於九月間必成如何

答南宗伯

冬間聞賢兄所慎非細每擬書探而未能的討柳川僂信至於隔歲闕候自愧誠意甚淺意外獲拜先施寵札雅度之不較令人欽感仍審春煦靜養起居對時珍重向時惟憂快臻平復棣堂間一時无妄之患終得後笑



之喜種種慰賀竊想幽居靜閒佳趣日生觀翫自得益  
復精到恨不能從傍參聽得爲李初平也沐洙秋間遭  
兩功幟門內意外喪慘亦不止一二而堂父喪事尤係  
門戶考德問業更無地子姪安做之痛可勝言喻顧此  
昏謬之物居然作一堂之老百事情憤憤無非舉目興感  
處奈何比來神氣長時失和小動輒呻嚙飲啖又頓減  
此等證祟俱是衰境不好消息而自得春氣眼病又添  
尋數一事亦復全廢其於朝未聞而夕已至何哉仙洞  
起亭之示令人歆羨但自在溪山占取爲已物得無爲  
造物者所笑乎然得此好主人棲息使荒閒寂寞之濱



得爲講道嘯咏之地則是豈非溪山之大幸耶梁頌主  
人自有好文章何事欲借俗人荒累之手以滓穢清泉  
白石之區也况拙辭尤拙於此等雖欲竭精疲神仰副  
賢朋之索恐不可得奈何前者一未登覽仙區物色俱  
是素昧近來諸名勝所詠及兄所品題者因便惠示以  
爲臥遊之資如何園亭若成欲偷一閑以爲數日盤旋  
之計而兄若不許庸人取次來將奈何講會兄意非不  
誠勤只緣無應者停廢已累年不勝慨然今當科年竊  
觀諸少意向此等冷淡事舉皆置之度外兄又因以置  
之則黌舍之間將不復聞絃誦之聲矣引導興起之方



如吾兄者不可不當其責幸須以閏月初間定期設講不但爲一場諷誦而止面誘以敦謹禮讓之風無負吾黨之望如何凡事應者應不應者不應亦不必強起其所不欲者以成濟濟之美也爲參從祖祀事來宿柳川恒雪小畱似小靜故搜見希弟所往復兄與子皞兄別紙則所見頗有精細處師友論辨之力似不少可喜朱張仁說之辨前已審見三賢所論而終不能無疑迷惑之見莫知適從近聞兄論及子皞所往復於希弟者則始知朱子說似無疑其所知不知不啻三十里之間晚覺可愧



與南宗伯

因貴中諸友相過細叩近日動靜備審棣床湛樂勝相  
明窓淨几對越聖賢有無限好意趣羨賀不已沐洙向  
時爛曉冬來少可而昏瞽倍甚誨之阿睹去益沉痼兄  
弟相對便成兩瞽使下上好書卷一任拋棄有若受批  
退產者然當此餘日無幾之時雖秉燭刻課分程趁限  
斷無開悟之望况如是放過只當無聞而歸悼歎奈何  
柳敬之暨子皞能遠從損友與希從八牛山靜處講了  
心經一部而歸柳象遠亦來聚者討吾黨此事自是稀  
有斯文自此有復振之望豈非朋儕相賀處耶弟則私



忌族窳次第巧值未得從倚聽讀恨歎可勝子皜見解  
聞益精到可喜如此第一樂事何必專讓於諸少友耶  
來春間似有閑幸覓得閒僻一處圖成一番良會如何  
如何以此意書告愚山翁若成得此事弟亦不辭爲劉  
家雞犬一舐丹鼎餘瀝耳道院講會紅疹方熾明春會  
士姑未可必故未得發文相勉而顧此謏蔑終非其人  
多士似無相應之理兄之謬屬可謂不審於知人可歎

與南宗伯

區區憂戀之意有倍平日而老憤日甚尚未得一晉慰  
舒自循第家非無來往便而以鄙村痘忌未免隔阻聞



復每在過後一未奉書素致意此心歉恨何可勝言卽  
者暑退涼生未審制履起居如何近憑往還貴邊者聞  
兄諸節則寢啗酬接一如平時云學力之堅定儘是朋  
友之所信得及者也但強制者恐不無內傷以是悶慮  
朱先生在故時猶與門弟輩講道寒泉諷誦不撤幸勿  
以悲疾無况謝卻或聽讀或論辨則自當爲開豁寬懷  
之一助而吾黨之望亦當不孤耳道院講會將以九月  
念間設行而自兄遭憾弟亦無况於此事似此寡護能  
侗之狀安得免見笑於諸生而亦豈有信從者乎可歎

答南宗伯



貴中諸益果如約而會自子稿袖中又奉致珍重惠狀  
滿紙辭旨懇懇切切勉戒備至一讀一拜不知老醜損  
友何以得此仍伏審緬禮不遠攀和號擗之痛想無異  
袒括爲之悲念不已凡節必多費惱心力制履起居不  
至大損天和否沐洙在家時因感冒發作失音不辭者  
至旬日強疾來此爲江風所觸一倍添劇只自尸坐聽  
讀些少發問亦未免借人之口如是而豈有一分相長  
之益耶當此不敢當之責者專恃於吾兄兄有所遭向  
八愚山承許合席愚山竟亦有故此心落莫豈但爲盛  
事未圓之歎而已耶惟幸一鄉子弟輩猶不以人鄙之



講儒會者至過七十餘員諸友之同席者亦至數十餘員吾黨好事孰過於此妙少中多有志學英秀者自貴中來者尤精於辨說志向亦似敦篤所謂斯焉取斯者豈不信耶賴兄先唱吾黨似有將來之望殊可幸也

與南宗伯

今春一天沴氣甚於乘風縱火遠近惡音無日不驚朋友親知聞耿耿懷戀倍切平昔適此忼到旣審靜中起居能得神明所相棣床同堂之間無他患報爲之奉賀不已沐洙天於私家終不悔禍柳川從叔母意外喪變已極悼痛而第十承宣堂父喪事又是萬萬夢外門戶



自此頽覆子姪益無依庇是何天之降割存極至此耶  
柳川遭變日仲哀冒入痘窠故蒼黃節次多有不得已  
從權處成服之禮將退行於望間遭此變節不無疑晦  
蓋聞近世知舊家所遭如此者通行追稅之禮而考之  
諸家禮說皆以聞喪過期者之不得不追稅爲言初無  
此等稅服之論未知何以處之似此矇瞶固不敢臆見  
妄說以犯汰哉之譏而第念此與追後聞喪有異當其  
含歛之時被髮跣擗已行其喪禮矣只以受服之小退  
似未必然如晦間遭變者其成服必在翌月故先輩多  
有此問難而諸家皆以不必待成服月而變服爲言此



不無可據者幸望博考諸家禮說與愚山兄及江左知  
禮處往復論辨使免大失禮之地如何

與南宗伯

卽日潦餘旱甚未審靜中道味日飲真腴起居衰健節  
亦復如何向聞愚山翁移几高軒相對至旬望云從容  
講討必有可聽說話而恨未得爲李初平於其間耳上  
舍友早了一事想益慥慥於實地工夫可喜也第自近  
年以來鄉道內氣象終未靜貼絃誦之聲寥寥無聞聞  
之望吾黨運厄仍作陽九耶浩歎無已李寢郎 思放  
不但自家榮幸 朝家義理不待辨而自明嶠南一區



從此脫出鬼關 大聖人處分真所謂不動而變感悚  
之極不覺涕淚之交頤沐洙杜門謝世頗覺省事而喋  
喋之謗猶且四面交至還可笑歎曩成偶吟曰滄浪濯  
足徒由我太昊浮雲一任渠蓋出於區區自省之意而  
或無近於太簡易耶然吾輩平日寬恕太過箴警不足  
致使此損友擇不精而守不固畢竟遭此無限狼狽吾  
賢友成物之功恐有未盡處望時惠德音隨事誨教對  
病投藥庶或免於無忌憚之小人有如向時言者之言  
則其幸當如何但暇曉長時赤爛裏耳竟日風雷精力  
之耗弊日甚一日其理不久於世亦奈何



舊堂先生文集卷之三



舊堂先生文集卷之四

書

與李穉道

塊

前冬惠幅有時披翫足慰如渴之思若使真面相對其  
喜當如何而所恨只尺紙耳伏惟新元亞庭道體益膺  
難老之慶凡經味有無窮至樂仰賀不已沐沐新年樣  
子依舊可笑點檢平生果成何事業而遽爾作五十二  
歲人物也惟欲杜門靜處學得龍蛇之蟄要作晚來存  
身妙法而頃者鳳院追享事係外先故不得固守本志  
一出會中愴恍迷昧觸事疎漏未免重負罪於亞庭門



下今於向晚之後雖有追謝之儀何敢以是自贖耶向  
書所喻朱子訓真是救病良劑而自愧知覺如癡騃小  
兒撓頭不肯服何敢望責效耶惟賴規誨以爲一分求  
益之計幸勿以爲前言之無益而特盡朋友道也

與金子河

朝起無聊偶閱小篋得鳳庵聯楊詩自愛心如玉誰憐  
劍澀苔之句甚愛執事心事恬淡清雅如瑤林瓊樹卻  
是風塵外物一場吟咏默有神會而相感者日未暮而  
意外寵札此際忽到奉讀驚喜始知信息之先發甚大  
也謹審霜秋省餘靜履珍重發之書辭者又如是鄭重



謹嚴不出尋常肝肺可想其學味增篤自有所得力於  
古君子遺言者未知明窓靜几所讀何書而至於如此  
長格也多賀多賀况滿紙誨喻箴警旣至譏諷又切將  
欲針膏灸肺滌盡腠理之痼讀之未半不覺愧赧而顏  
發駢使尚書爲之斂衽而平子爲之絕倒也沐洙年來  
慵癖轉成昏惰三百六十無非醉夢中日月廢卷卻筆  
與几硯間四友者交分已疎而太守課督甚於咸陽之  
徭自不能脫得乎羈勒之中果有一番赴招之事而非  
欲強飾嫫母與粉粧西施競較其妍媸也蓋其平生自  
處不欲與常調俗士潔潔自異未免爲牽引之累而自



愧夫十年伎倆猶未搔爬已盡宜乎識高見透如執事者一笑而唾之矣日沒星稀前輩已遠當面媚嫵交道久絕未聞以誠正真箇之工責勉於朋友而惟執事之書則能知慨然乎流俗之浮華引勸以今世以上之人意寄勤懇反覆不遺其溫諄處則使人不衣而自暖其警發處則使人肅然有清意執事志向何其高明而執事之厚意又何其盛也若實德未彰之語則誠是切中之喻敢不悚然自勉而所謂文譽頗振之語何其嘲戲至此也世之取藝如九方臯之相馬略其玄黃而舉其駿逸如我疲羸駑駘之類安能並輿馳逐於才藝之場



而以偷得無譽之譽也此則不當不當且來書中心灰  
二字不能無惑具衆應萬自是一心之用寂然冥然只  
作一死物者非學者所以操心涵養之道何必蕭索寡  
與自歸於禪家所謂不動不生玄玄默默之地也耶要  
願極加自力使學業增進區區之望也

與洪光之

勤勤情訊輒爲病友所先奉復感佩平日取友之良吾  
亦可以自信耳仍審高秋調候一樣爲慰第阿睹所苦  
連服丸餌終未得撥雲奇效不勝悶念然今世之不病  
心者幾人兄目雖可惜閉睫靜坐安養心神則一片靈



臺湛然虛明自當見靈靈灑灑境界豈不愈於世人心  
病全成盲瞽沉沉入黑窰地耶朱夫子晚有眼病自道  
收養有功進道益明至恨盲瞶之不早幸佩此訓母以  
病苦爲苦而惟以進道爲意如何沐沐向來果患癰疥  
將入山調治爲劇憂所絆此計亦未遂故近者有和學  
子詩曰此翁事事無如意那得山中一日閑者卽實際  
語也然自家搔癢不過皮膚所苦不足深慮而誨之屢  
月呻吟之餘因成蠱漲腹肚如撐鼓交試湯餌針灸而  
病勢日漸沉重其兄之心當何如以此之故秋間一晉  
穩舒是所一年經營而其勢未由吾輩一會果知有數



奈何舊堂之名非欲自爲標號只是弊屋重修後不忘  
先舊之意而已不須可言而高軒之命名金篦令人情  
緒慨然然他日相對將先刮吾目奚但刮兄病眸而止  
耶弟雖不文若起家第之病則豈不仰副勤託以慰病  
中之思也

答李方伯

秉模

窮巷間賤拙姓名何以獲聞崇聽乃至降屈尊威特垂  
此意外寵書也奉讀未半且驚且愧不覺汗發沾衣謹  
伏審中夏政體起居萬重伏慰區區今閣下上奉聖  
旨下招儒士至有講義考校之命此實昭代之盛事士



林之光寵雖聳目跛躄之類孰不欲聳慕趨走以供其  
觀聽之美而况被招中人其榮尤當何如也第沐沐才  
性本鈍劣見識極鹵莽於經傳蘊奧曾無半晌諷誦一  
字窮究之工雖魚魯承亥尚未分何樣字畫其何敢不  
量謏寡與齒於羣儒勘校之列哉平生伎倆小有場屋  
間虛名甚至於重欺鄉隣厚誣閤下以致此千萬不敢  
當之教面駢心慙覓不得措躬之所也仍伏念閤下此  
舉既是朝令而非私速則野人雖甚迷愚粗識分義  
固當躬詣節下伏陳其蒙駭蔑劣之實狀而頃以計偕  
之役六旬奔走仍成勞瘁轉輾床席晝宵叫苦顧此病



狀萬無一日鞍馬之勢使大人寵命未免虛辱違傲之  
罪安敢自逃

答李德懋

頃聞賢閣棄中閨就校村奉慰大府寓屏以憂畏之故  
恨未得直入匠所與兄相唁意外長牋忽墜於頽枕吟  
暑之中蹶然驚起不覺歛衽三讀耳但自道情事足令  
聽者酸鼻况數十年伉儷之義子仍審甚熟省餘服履  
以時保重沐洙五十年許多勞攘徒是枉了人區區遲  
暮之願惟欲用吾拙法杜門塞兌不以外撓相干庶幾  
親近書史講究古人緒餘保得一日無事要爲一日清



福而已世間事多敗人意近以無限疾病長時焦惱文  
壻之天資甚健政有將來之望者頃以凶聞至兩餘新  
曝煽發滿腸宿火脫冠露足恣意顛放殆無生意而道  
內不敢當之命謬責此際似此疎拙無非不堪聊遣處  
自承此奇以來慚惶戰憂添得一箇症患中夜不寐當  
食不甘百爾所思惟以拙者之所自知者決意守分不  
欲誤了大事朋友四面之責將拱手而不敢辭也今此  
盛教意實珍重明以義理勉以先輩辭嚴義正足令瘖  
聾跛躄之流亦爲之趨走響聲之不暇矣沐洙雖不佞  
敢不回心改圖勉以從事思所以仰答相愛之責耶第



來書中滿紙辭義抑揚反復有若不佞爲計較利害怵  
怕禍福者然此則明者恐不知我也不佞嘗粗讀聖賢  
遺書側聞古君子遺風平日所守自有定分決不當外  
怵內懾卻效得聽冰之狐首穴之鼠耳使不佞言論果  
如先輩風采如先輩氣力如先輩識量規模果如先輩  
且吾不西行大事不成或能追武於古之賈彪則吾何  
惜奮袂一起共濟大事以生吾黨萬丈光色耶顧此乎  
生性質則柔軟而不剛作事則憤憤而無力所見則昏  
愚而不明應物則粗率而不審拙澀如婦女執滯如木  
強以此而行東顛西倒將不勝其狼狽矣雖問里黨塾



之間聞人之多會則輒縮首而不敢出者自是自家藏拙之一究竟也何況聲討兇逆何等大事抗章叫閤何等重事雖使趨走未席與參大議猶不堪其猥又況主張風旨爲一道章甫之首乎其所以僨大事而貽吾嶺之羞者不下而明矣朱先生言擔子輕重在他人不知惟擔不起者自知此切語也如賢者之深悉此狀而猶且如是他人又何可爲恨耶自揣已明實有擔不起之憂故向於江院望會悉暴愚悃要爲斷然自退之計不恭之罪固難自逃惶悶奈何雖然此非爲私計也乃爲大事也環顧吾南七十州堂堂可堪之士自有其入



沐浴之自處豈非一道之幸而又非大事之幸耶如我  
碌碌者只當退伏窮廬以待因人成事之日矣

答李德懋

初吉所惠長牋始拜初九而上下數百言無非所以慨  
正學之不明痛邪說之橫流思欲以明正學而闢邪說  
辭嚴義正一尺短紙足可以懼凶邪之魂而起衰頹之  
風也固當卽相往復以爲講明扶道之一助而承牘旣  
晚一門內又有哀慶人事之撓尚今闕然不報想致訝  
多矣今朝一陽初復伏惟春暉氣力萬衛省餘學味增  
和沐浴衰痺雖甚尚巾櫛起動日用瑣節不須奉聞噫



噫聖遠人公間不無異端邪說有若楊墨老佛之道者  
而其所以毀滅天常斁絕人彞夷狄禽獸之反不若者  
豈有如一種洋學之千妖百怪乎是何橫流一派乃敢  
汎濫衝決於衣冠禮義之邦舉青邱一域浸浸然入於  
一切懷襄中所謂洪水猛獍之禍不足以喻其毒也惟  
吾嶺一區之超然獨免於今日陸沉之時者直以先正  
遺教猶有未盡前輩遺風猶有所傳里巷子弟皆知學  
習詩書巖穴老宿皆知誦法程朱爲學而不失門路律  
身而不出繩墨視異端邪學若烏啄之不可食而熱火  
之不可近故也然則爲今日熄邪備患之道莫如講實



學而明正道而已夫盛水滿器置之狂濤汨浪之中而外水之不敢混入者以其器之本實也若使吾黨君子不曰吾學之已明而益勉其講明之工不曰吾嶺之無憂而益思其閒邪之道使絃誦之聲日聞於庠序禮讓之節日習於黨塾務率一鄉子弟舉入於吾儒轂律之中則吾之正學當漸明矣在吾之學旣明則在吾之理亦自明矣夫豈有邪學之蠱其心而異說之汨其性乎今之談者或曰半晌諷誦無補於明善之工一場講說無益於復初之方而此實不然聖賢之至訓格說無非明善復初之方若得以孔孟思曾之書周張程朱之說



從容講討反覆問難使之浸灌於中提警於耳則一日  
講學當有一日之效二日講學當有二日之效鄒聖所  
謂使邪說不得作者孰有切於講學二字也似此淡冷  
說話雖若陳腐而實易爲功雖若迂緩而實易爲力未  
知盛意以爲如何若以賤言或可採賢兄方爲講學所  
主人幸望發此議論往復於道院講文及此來正使之  
通讀大小學等書以爲八德基址如何前者講會每欠  
草率者蓋以多士供費之不足故耳自講學所多少合  
力期於六七日講討必使了盡一帙則尤豈非可幸耶  
聞有往復於愚山杜陵云其所答如何



與金幼精

承拜不知幾歲月執事近年所遭合有一書致慰而懶  
慢成痼闕然至此契分家憂憾與共之誼豈宜如是更  
不必追提以觸割腸慈刀而知友之痛惜尙爾竊念卜  
子之明雖欲不喪得乎卽聞尊嫂淑夫人襄禮迫臨未  
審悲惱之餘服履起居不至致損神用否季父孝友行  
誼實有家中潛德而不肖子姪罪大不仁恐無以傳後  
幸賴珍重一言得以聞發幽光日與從弟感泣不知所  
以爲謝鄙家世系修上幸望裁酌以入篇末亦依狀例  
書填街諱以卒令惠如何竊聞近日閒中所得至於盈



箱溢案以待後世子雲云有德之言想多有嘉惠後人  
裨補世教者而恨未得一者周旋於明窓几之間盡  
發瓊笥得聞其所未聞也顧此蒲質早衰種種善病不  
但不健素患阿睹因衰倍苦僂成全鼓目將此餘日亦不  
得付之殘編桑榆寡過之願無計自遂奈何閉門拙跡  
渡江無期執事亦當七耄似難命駕數百里外未知何  
日更拚清範惟願益加珍護以副區區之忱

答柳象遠

日來思戀倍多端价忽致手滋仍審姑母體候別無添  
損侍况亦一樣慰幸區區長縣特除之命極是格外



異數遐土一箇書生有何乎忱之上格 宸衷榮養之  
恩至及於老慈氏也去就一節固非野翁所可容議而  
前者之勸其隨例赴 肅者蓋爲其末稍必有難處節  
拍故也今此所處雖似有辭受取舍之嫌而古人之所  
以奉檄而喜者實出於爲親非爲仕也君子是之君之  
今日所見正看得一是字雖或爲清高者閒議論所雌  
黃何傷之有但思所以仰答分憂之責上不負。聖主  
特恩下不負自家所學使此老從與有光焉千萬切望

答柳象遠

三百里外二朔阻音自非異事而此心之鬱陶無異二



年官隸際茲來到因獲手簡滿紙辭意優若對坐欣喜  
不可言况審政履珍重何等慰仰第姑母調節連在欠  
和中專城之養何所不至而沉痾之難祛至於如是遠  
外貢慮自不能小弛今此餞迎固非客中所宜過而知  
惟感觸情事必有排不得者然壽母令妻臨上在傍兄  
弟聯床湛洽自當有詩人宴喜之樂比之此間永感懷  
緒其况味何如竊觀來書辭旨字畫委曲既盡精彩倍  
生不帶簿牒間忙擾氣象自有古人意味可想梅燈淡  
處一部朱書恆在案頭豈非老從之所深喜者耶荒年  
糴事此官政之最可憂者而能善推其在家時戒畏之



心不煩一鞭蒲乃至早自了刷云不但正副此中之望  
庶不負聖上分憂之至意益令人歎尚不已催租不  
撓四字題目又何其善說得雍容不迫底治象也近來  
爲政者莫不以撓民刻民爲第一妙策而湖伯能知不  
擾之爲貴書此上考其人亦必有仁人之心者爲生民  
可賀春間賦政亦用此不擾二字以求終譽千萬切望  
所封祭需榮享之孝推內及外每當奉受不勝喜悅內  
從過今夕則又添一齒矣不知生世六十三有何事業  
可聞於人也惟幸旬月之間兩姪婦各舉丈夫子天或  
從此命吉命喆否李君調况尚不健云方壯之年何故



至此伊川先生甚愛表記莊敬日強之語益加莊敬工夫不使昏惰乘之則必爲日強之萬全良劑以是之勉

與柳象遠

令亞庭從氏入地前爲哭靈床今日來此愚谷滿目光景益不勝撫念悼慟之懷而已天旱去而愈酷雖床第偃臥者莫不中毒喘喘欲死况犯此頑炎何堪作三百里外遠役也西旆果以旬間發向則入城計在望前在途及抵泊後得無大段傷暑之患卽爲回蓋以日間歸侍耶八洛日自上必有召對之命而亦或入參講筵否君之所存所學素甚真實無僞而但榮寵過極威



名難副世道嘒嘒吹毛者多老從區區之心自不無爲  
君憂懼耳冀勉餘亦不無多少可議者而山野老物何  
必煩諸紙幅耶

與柳象遠

五月季弟去時付唁字而慘惻之極把筆無言不能詳  
及彼此安否其後過盡三夏而書音因阻雖緣此無的  
便可討君則出於慎重至意而晝宵鬱慮之懷則兩地  
想一般憧憧向因生物戚回便旣聞小嬌順痘消息及  
姑母攝候不甚添損君亦於排遣不得處能以理寬制  
仰慰自抑視篆如一云慰幸不可言每念寂寞客裏所



遭情地在常人則幾何不廢職棄事發狂成疾而惟君  
平日學力自有所養于中謂必不至於忘老親而傷吾  
生負 聖恩而懈民事今此所聞果如所料老從之知  
君於是而益信得及矣即日旱災大地成爐無物不焦  
姑母調養節比來若何省餘政履一向有相否一心薦  
謹二字如傷不須加勉而近觀吾儕中作吏者柔弱常  
勝而明斷常不足故多被猾吏輩所操縱雖欲行仁而  
仁政未行雖欲施惠而惠澤未究往往得罪於上而見  
笑於人此豈非可戒者耶然明生於清威生於廉此心  
清虛寡欲則吏民豈有不自然畏信而明威之不患不



立矣區區所願豈欲效俗吏輩專務殘忍刻酷自以爲  
令行禁止者爲耶官中負債幾至累百云果未量入爲  
出自是用財者節度而况居官如雇不可知者明日事  
必須十分節約勿引用當朔之外如何非欲其稍存贏  
餘以爲日後計慮事之道自不得不然也且聞以賓客  
之煩撓頗閤禁云官衙若不靜因此害政之端難保其  
必無鈴門之不得以閑其勢固然而但念親戚知舊或  
委問或歷訪因致彷徨門外甚至畱滯客店則爲主者  
心安得以自安乎迺見則莫如到卽接見以盡其歡愛  
如平昔在家時若有不緊所囑一切揮卻以至不阻情



而不害政則道理似有餘裕未知如何顧以山野迂拙之見謀及於不當之地有若指揮官政者雖若可笑而區區親愛之心無所不至一心冀望惟在於得爲古之循吏上不負聖上分憂之責下不失親戚期待之誼故煩縷至此諒悉如何內從伯仲眼苦當暑倍劇雖欲將此餘日付之殘篇而其勢末由奈何目今極無之災甚於甲寅當牧民之責者尤不得不勞心凡所以救民之方必預爲料理使一方生靈得以保活如何

答柳象遠

近來聲息落落無憑懸溯一念耿耿切切官隸此際來



到仍承手墨滿紙辭意無異相對披豁仍審姑母調節  
比益添損遠外焦悶不可形喻而政履起居亦未免病  
暑呻嚙向來西行正當威暑奔走安得無中暍勞頓之  
患耶况荒年民憂極是守土者費盡心力處來頭接濟  
之策何以料理民心本善在上者若施哀矜之意雖飢  
無怨必須存心愛物仰副分憂 聖念至祝至於剝民  
肥已雖勸之君必不爲而伏審近日 聖教如是惻怛  
須於食息間勿忘 至教之意如何但灾年守令之不  
得任意由歸其勢固然念及君情事不覺令人哽噎

答柳象遠



意外官隸來到因獲滿紙手墨感豁不可勝狀而姑母  
調節近致添損諺書中亦以君羸憊憂念不已遠外悶  
慮可勝言哉近海之地水土湫濕自與嶺土有異板輿  
奉還之計甚是善思量而但所差陪筵旣以親瘠呈頌  
則卽發果似有嫌處事之精詳可以見得而晦間之圖  
亦或無爲臥轍之民所交過耶奔哭之差池情事之難  
堪安得不如來示而委身於國者事體自不同惟當叅  
以情禮道理使公私之間不相徑庭如何今年荒憂秋  
來所見去益寒心而堂上之見與堂下之見豐凶判異  
云將何以救濟生民來書中有食不下咽之語須善推



此心也內從不甚吟苦而季嫂終祥奄過撫念悲傷無以爲喻四百里外起伻自非容易而至能及此祥期人理上曲盡實是難及處而必欲如是則自多有撓惱之端是問古人以傭說贈零陵守爲吏者真如爲傭凡所煩費必須節約無犯後朔債如何夫然後吾之去就進退任其所意不至牽縛矣

答柳象遠

頃在劫火中出没人鬼故積阻餘一會之便竟至相失雖喪威震剝中耿然一念至今如缺卽茲官隸委到因承惠幅顛倒披讀滿紙辭意無異對床情話矧審半千



驅馳之餘政履起居不至大段愆和遠外憂戀稍釋一  
半第亞庭從氏終祥奄過罔涯情緒安得不如所示日  
間進省姑母顙色則允節比前似勝不須過焦慮也服  
從室人雖衰病滋甚而豈意今日遽至奄忽耶與經三  
年喪者三與同甘苦者四十餘年暮境相失悲慟情事  
不但八室悽酸而已而再從兄又以前月十四不幸棄  
世同堂兄弟已折其首悼傷亦極矣至切喪變如是存  
酷自家精神筋力日覺耗瘁病後餘毒蘇醒無期奈何  
向時光景所謂復恐初從亂離說者是何大地生靈逢  
此長平之厄至使主上憂傷朝野震蕩也朝家多



事費用無數飢民困瘁窮憂轉浹此時守宰之用心焦  
思可以想得未知君之力量料度果能仰答分憂之意  
下慰生民之望耶經綸條進之策 朝命之下不得不  
悉心對揚若與之對坐則似或有一得之見以備芻蕘  
之擇而但各在遠地既無相議之勢喪憂餘喘不但視  
息都喪襄期迫頭心神騷擾雖欲畱念其勢未由以平  
日所得於經術者爛思熟慮宛轉措辭如何竊伏念  
聖上求言之意實出於爲生民懇懇者而目今需用之  
匱蕩尤是朝家之一大緊急處 聖上所欲聞者將博  
濟生靈補給國用之計俱是猝難料畫者然人臣進言



當以務本爲主而不可以一切功利之說只爲目前救  
末之計鄙意則似或以大學八條爲經中庸九經爲緯  
作一篇宗旨中間敷陳時弊始末而各條下繼陳救弊  
之策末端則以節儉二字惓惓陳戒而終之以人主一  
心爲主宰如何

答柳象遠

今日將進值雨因寢行方庸鬱戀意外貴倅帶策來到  
獲承惠墨憑審姑母調體比來添損省履尚有餘慙爲  
之奉悶不已邊君去時小外未見傳者亦不一猶未知  
遁解與否果獲所圖得脫樊籠快適可想仕宦者多一



出不知歸而能穩尋途初賦侍傍歡愉令人歎賞再明  
祥事雖是卜日之制悲愴如新疑變節顧此昧昧何敢  
質言謹考開元禮若再周而後葬則以葬之後月爲練  
又後月爲大祥祥而卽吉無復禫矣至於稅服條則別  
無變服之節以常服稅之似無大害於禮意故向年子  
希所處似如此而時未入坐姑未詳問河上已行之節  
必有所據而便是貴中家禮依此行之亦何害於從厚  
之道耶二者間詳量得宜如何

與三江疏會中

淫潦涉月未審僉履起居若何馳想下風第切區區沐



沐素苦暑症近復煽發精神恆在烟霧濕熱下結痢候  
旋見後重而點瀝者又三日矣此病作家已久姑無目  
下危急故待儒實強加衣冠而敵強我弱終是生變之  
物不知前頭伏熱將何以活過也疏事定論已久風聲  
又動堂堂士氣不可前却袖章登途日急一日而只  
緣此一箇怪妄人物徒知以拙自守而一味惶愧不敢  
出頭又此病狀實有途路僵仆之慮私情憂迫勢沒承  
命以至遠近章甫相聚至再羣居之勞淹留之苦又費  
七八日使大事遷就至此者沐洙之罪也使僉文勞苦  
至此者沐洙之罪也每中夜以思不覺惕然驚懼因知



何地措躬也雖然吾黨諸人俱是同室兄弟也昏愚者當矜之疾病者當憐之凡所使令固當量其人之力而擔任之因其人之性而利導之察其人之情而曲恕之寬裕不迫以盡其相愛之道不必強其所不能責其所難堪欲令蹙者馳走瘖者嚶聲而豈有可得之理乎以今日事面觀之鄙之實情想已諦得矣鄙之實病想已照得而猶且牽拖之不已驅迫之不已禮請之賓奉幣之儒逐日奔走去單還單逐日紛擾有若爭是非決勝負者而大事之成不成亦不暇料量深念者然此沐洙之所以憂窘戰縮自不能無感者也朱先生每以伉拙



捐狹氣質偏處尋常自憂於書牘之中况如沐洙之庸  
陋一小生偏性已作痼疾一朝變化其可得乎第念衆  
論之下不遜大矣朋友中雖有知我者其憤怒駭愕當  
作何如氣象也如此而身名陷敗將不可勝言矣抗何  
顏面復對昔日朋友也聞成叔晦朴良仲二老兄在座  
云何不力救其將溺之友而納之於相棄之域也鄙意  
則一決難回道意則一向強迫故憂悶之情迫不得不忍  
今去單辭似未免鶻突了無非罪也區區所願惟俟速  
加嚴罰幸僉丈無相攛掇屏置數外畱作窮巷間一閑  
漢俾保桑榆餘日則豈非君子愛人之德乎不然勢將



絕羣匿跡遁八灞陵山中而不知悔矣

與近巖疏會中

伏惟盛炎會中僉尊候萬重今日之會未知幾員而竊想皆是吾黨同志區區一忱豈不仄身頃嚮况僉丈之冒暑勞動至再至三者莫非不佞之罪也大事之遷延時月坐失其機者亦由不佞之故也顧此一箇物何以過蒙道內之謬知使今日而得罪吾黨至此之極也頃以咫尺一紙悉暴愚悃敢投於江院會中時值罷會未獲關聽故今又起送家弟奉拜僉執事座下若賜取照則拙性之去益偏滯終無變化之狀可以俯悉矣竊未



知道中今日之意將欲成大事耶抑否耶如欲必成大  
事則如此自愚之物決不當委以重任如此固執之物  
決不當驅逐千里炎程也不佞之前後執迷終不敢承  
命者只是爲大事而非爲私計也凡事貴在速成他人  
之規密成否者亦多可慮幸望僉尊十分減量爲先鳴  
鼓不佞嚴警退伏之罪以立風聲卽地改薦可堪之士  
急急治疏速濟大事無使下莊子從侑竊笑千萬切祝  
區區所陳實出僉丈之罪我知我惟在此紙耳

與道院會中

珥霖乍晴陽煦始舒伏惟清齋肅穆僉候動止萬重沐



洙喪餘殘喘向哭姪女寃逝近失新抱孩孫中毒滋甚  
萬念都索而重以偶然感氣浸浸潑入衾席却餌者已  
至累日滿身發黃觀者慮以疽漸甚是不好消息只當  
聽天處分而自顧六十年所得何事竊恐因此作無聞  
之鬼耳就鄉飲禮贊相之役此等儀節素甚矇昧而猶  
以樽俎間有事爲榮初不敢辭避自帶功制亦不敢欲  
相古禮而先自壞禮向者書懇北郭告以遞改之意則  
以鄉會中所薦推之於鄉會時故泯默退俟今此齊會  
卽是鄉會敦定大論排布凡節想在此席而此間病源  
已深惟望薦出無故之人使之考禮書講儀文無臨時



窘遽之患如何吾鄉此論極是盛事望八僉父老之勤  
勤至意當此鄉俗頽壞之日必欲追成三代古禮者夫  
豈偶爾因此一舉庶復覩孝悌揖遜之風則其在承上  
接下之地固當趁速奉應贊成盛儀先定主人然後繼  
請賓介當爲次第節次儀禮以諸侯之卿大夫爲主以  
此意稟告城主若未蒙許卽稟尊老預定主人以爲次  
第設施之地如何

與李幼成

得一晤語固是吾輩難得事而向蒙左顧巧違拚敘清  
旆云向蓮庵講所故欲躡餘塵攜兩弟追到則御者已



返矣悵惘懷思迨猶未已日前風寒一番猝酷未審靜  
養履候得無戒損棣樂增重否沐洙許多撓惱事近纔  
小靜而自家昏惰狀誨之眼苦去益成痼自憐奈何畱  
示瓊篇前古罕見之傑作素知富庫而何其大費此如  
許好氣力也不但句好亦多好意致三復諷詠令人敬  
歎不計工拙敢不和呈而老弊筋力短乏無餘苟非旬  
月工夫實無以仰供咸陽之繇姑俟一日閒靜別韻仰  
謝計而門外之索方急安得暇及詩債耶賢郎逶迤惠  
訪勤意可感儀度益成氣味益雅如此長進何患不爲  
君子人愛悅不已



與李幼成

拜書未覆已至數旬歉悚曷喻似聞尊旆東遊知舊間  
未知幾日返稅省下動止復若何瞻溯區區向時講會  
之約前後蒙許不啻申申而竟孤所望自愧求友之誠  
不如谷鳥非無老少諸益之五六月團討者而此心缺  
悵可勝言哉允咸兩君累日出寓及期勤到星山宋君  
亦聞風遠到可想其志學疲篤若使此心有恆則其進  
豈可量周旋揖遜之節益復謹雅殊可賀也沐洙合下  
陋劣重以心麤之病經義討論非所可言而秋氣乍涼  
感氣因乘或至達夜咳嗽不成喉音者又月餘矣只自



終日尸坐無所發難全無一分資益於人人之所資已  
者實多而聽卽便念又無所益拊躬慚怍久猶未解來  
書中反有過當之教豈意吾兄抑揚太過不知自歸於  
失言之科耶旋以是獻箴也明春將更圖此會以了一  
部未了講者惟望其時寵臨以慰多士之望如何

與李幼成

元佑堯舜奄棄臣民普痛何喻前後三度情訊特出尋  
常又以三種常珍餘味助悅病口銘感可勝卽日春寒  
小解陽德流化伏惟萱幃鼎茵康護省下棣床怡怡且  
湛于舍學况佳迪仰慰區區沐洙向來一疾崇以風感



浸浸向鬼關者四十餘日自日間元症少減而真元銷  
脫無餘漸漸奄奄有若戌亥會方盡之象自憐奈何且  
耳濃流汁眼合如糊冰漸滿膈達夜嗽喘百態俱醜無  
足可言因此作盲聾物固無妨耶吾黨氣象有若百川  
奔盪萬壑喧騰未知何時可以底定得失是非已是既  
往不須追說而大凡事理之失常常在於過處議論之  
生病常在於激處激則乖乖則離者相因之勢也爲今  
日計莫若歸一而保和然後從容鎮定庶可有善後道  
理老兄處於中道與左右士友必多有逢迎之便必須  
相戒以激字息所以從容鎮定講究得十分善後之責



如何近者朋友諸人貽書責勉以保合之道而如弟昏  
謬者不但觸處狼狽長縮不暇自量已分萬無以塞朋  
友之責只自憂歎而已

與金一元

履範

一謝非不日謀老炎劇怕終未遂意始恨小約亦不如  
不約意外獲承惠狀仍審日間棣床服履晏相爲慰十  
分此日可惜之歎尤是餘日無多者之一般懷然衛公  
九十猶作抑戒詩日使人諷誦吾輩猶是少年况兄於  
案上朱書日日沉潛必有悅之深而樂之極者今此光  
陰流邁之感抑豈非惟日不足之意耶沐洙昏憤日甚



正所謂無所用心者亦難矣哉更何足可聞今番時霽  
若今日而止則天心若知農民之心而或恐支離也祝  
融頑威似當因此少戢殘病老物亦可以少蘇耶暑氣  
若退當不卜日進敘耳

答金一元

三冬始見一白可謂喜雪而大地便成冰窟江上寒齋  
想必有冷落之苦方瞻朔倍切意外赤腳衝踏萬逕蹊  
滅之際奉致惠狀驚倒何言仍審服履起居神衛晏重  
仰慰區區有時拂亂之示雖天所降任之君子亦有所  
不免每當外物攪撓時敬對案上朱書潛心玩味自當



心神安貼而動亦常靜以是奉勉沐洙前月念間要爲  
小靜取溫之計分樓兩齋庵而亦不無應接之撓所當  
之役尚未斷手今又還樓而昨過寒熱少病冷泄又種  
種發作未免一飯三流失之歎奈何今宗君早當板蕩  
家務實難專意工夫而立志若固抑豈無隨隙省讀之  
時耶須以一帙冊子置之案上有事則捲卷事已則開  
卷以勿忘勿助之意常爲提勉如何

與李穉春

塢

羅鄉瘴窟是豈林壑閉戶者平日所料事耶七十老人  
雖寢興於床第上尚難自堪况跋涉嚴程安得免撼頓



損遽之患未知幾日到古島所住館次不至湫隘氓俗  
不至獷悍風氣不至乖惡耶種種疥慮之忱中夜轉輾  
不能安寢耳然素患行患之道自是執事平日所講者  
一部經傳必有橐中所隨幸須溫理舊業益勉忠信篤  
敬之行無入而不自得則古君子俟天立命之地惟在  
於此孤島窮寂之愁詎足以攬我方寸耶以是慰祝近  
聞朝廷風色以此不安不無一二所聞而不敢傳道惟  
誦李白詩何日金鷄放赦回之句耳沐浴居然望八老  
轉深而病愈甚精神常在烟霧中筋力奄奄若泉下人  
自知不久於世執事雖好顏還鄉恐不得迎笑奈何向



聞行聲竊欲效先輩靈芝之餞使從弟候行於中路病  
戚兄弟將次第追躡計終不知取路何邊而經由何處  
竟違千里握手之別此心悵恨可勝喻哉自鄙門略表  
賸儀而直達無路送呈于本宅因修短幅傾瀉區區之  
懷關照早晚不可知臨紙益切悽黯

與蓮庵講會所

得吾黨好朋友講先覺好文字是何等好事而僅與象  
從半晌諷誦二賢聯翩左顧而未免俄頃相失此老之  
分薄於諸君子何若是也卽惟明窓靜几下問辨溫理  
之工日新又新必有手舞足蹈之樂所得旣富中心脫



豫則僉賢動止自當神旺氣泰也且美且賀無任區區  
未知幾日了得講討歷路惠訪耶第等好學則雖未能  
李初平之從徇聽讀則蓋是宿願而私忌族寔鱗次糾  
掣欲往從之而其勢末由使此吾儒家第一等樂事專  
讓於五六僉賢悼哉此生終無聞道之日耶希第辨說  
太了了象弟過於內而不出二性雖殊恐俱未免學者  
一病痛交相切磋畢竟無過不及之歎則豈非諸賢強  
輔之益耶見解雖或有未盡合處必須各自虛心反復  
歸一亦不必詰辨太過有若詞訟家是非甲乙相持之  
際反欠於平易圓活底本意趣如何李少及家蒙俱是



初學若不丁寧開牖則無異瞽丹青而聾鐘鼓幸望指南迷路起居言動之節亦隨地教戒如何欲贖期會不叅之罪漫咏三律兄弟聯呈可得一笑惠和耶

與龍寺講會所

道院之別居然三易月矣未審至寒僉德履何似聞自初吉又成得好會於禪房靜處講討近思一部苟非僉賢好學之誠進道之篤安得辦此吾黨間第一好事耶此友雖昏憤蔑劣亦有朝聞夕死之願蓋常惓惓於此事者初欲以身廁坐於諷誦席末得聞其一二緒餘以爲一分資益開發之計適值有事先暮及歸而又以先



忌齋居竟未遂懇懇傾遲之忱與賢友輩一場論討儘  
覺有數也未知會者果幾員所講書已究竟耶賢輩看  
得本自細密互相發明想更無餘蘊而但論難之際似  
或有同異之見須反覆從容務歸停當洽好處討論外  
凡所日用常行上踐履處亦交相加勉以盡朋友切偲  
之責是所區區耳姪兒蒙昧見識不足爲可教孺子而  
使少輩得以周旋於長者之後知吾黨有如此事者亦  
似有觀感之一道故其父兄之所以命送渠之所以願  
從者此也言談舉止間或無粗率不遜之端耶

與南子高



忽見新歲懷戀倍耿伏惟兩庭體衛茂納川休省餘棣  
樂增勝學味舊見之外日生新意必有資之疲而悅之  
至者慰賀區區樗翁近復何狀逢秋情事令人慨慨沐  
殊誰謂是七十稀年自笑老馬爲駒遍修一門歲儀連  
倒十數盃酌可謂猖狂自恣歸臥誦衛公抑戒詩不覺  
愧恨良深顧此放倒如是而向承尊書全無箴規之意  
若望僕或有一分資益之道而推借太過尤不勝愧赧  
胎紙所示知己間一言是金石既有好約則事貴速成  
况尊奉老下形勢果爲緊急卽對希從促其成禮則小  
閨差軟弱姑未成云此則實情也少待之如何



答南子皞

慈聖禮陟普痛何言頃於伏枕奄奄中忽承意外手書  
滿紙辭意箴勉備至憂歎繼切使人讀而聽之不覺欽  
歎不已但其時手戰不能作字昏憤又不得呼寫竟闕  
謝字歎恨曷勝卽惟春寒尊幃體衛萬康省餘棣樂增  
重講論不輟見到益精熟仰慰區區沐沐卧病四十餘  
日筋力漸脫有若戍友會方盡之象諺所謂老人之卧  
如臥麥者真切譬也所示多少憂悶之意近日吾黨氣  
象大段不佳有識之竊歎安得不爾但門戶各立此疆  
彼界之說左右之慮誠過矣如弟本無門戶豈有各立



之象同室之事從當歸一亦豈有疆界之別耶向者金  
炳汝亦有書其責勉之意與左右書畧同顧此昏謬無  
似何以得此於朋友之間而不置之鄙斥之科耶然允  
在既往者諫之無及言之亦無補而前面節拍自多有  
講究道理若使此心鑑空衡平物來應順而已則自當  
有見道理正當分明處幸以所得於靜中者不憚往復  
以開蒙蔽則如第三損者猶當過不憚改函席之間亦  
從容陳稟補其遺忘以爲左右而先後之則難處之中  
固自有善處之道今日之責當在於直諒強輔如左右  
輩區區所望實不淺淺



答鄭明應

左顧之枉俯書之惠皆出於相戀不置勤勤懇懇之意而向時謝帖巧值中間浮沉初冬有歷候便而又值旆外因失一宵穩討自愧老醜無分於賢友此心缺恨可勝喻哉卽茲至寒未審靜履棣樂增相否近者方對何書秋間人事之撓想已了盡歲餘日餘政在冬夜果不以素工之已足而更加十分工程所得益復充裕所見益復精到自家知見有能吻合古人之心而自至於手舞足蹈境界耶吾黨今日之望惟在於如賢兄者年富力強之四五君子幸須千萬加意以副此區區如何沐



洙前月晦間從叔父衣冠復出世因卽舉緬子姪安仰  
之慟如新奈何年來杜戶屏伏家事則付之迷兒鄉事  
則付之耳外可謂終日閒居無一所事而精神筋力憤  
茶昏悴案上黃卷幾至塵沒數寸旣無朝聞之望而已  
迫夕死之期悼哉悼哉吾兄不知此間之狀而前書反  
有相勉之語拊躬自顧只切愧懼而已

答金炳汝

虎燦

東朝禮陟率土痛均向於久病中神緒忽忽飛越往往  
起懷於少日親素之間而只有難作之感次及於賢似  
式穀之諸友而又恨無相接之緣意外一幅清訊忽若



自天有賁且驚且喜不覺沉痾祛體承牘後月改而春  
又半未審閒裏學况復如何明窓棐几日對簡冊有從  
容翫味之樂耶每仰念尊先府志業不幸未卒區區所  
望於克肖之賢契者實不尋常幸十分加勉無負此老  
相期之意如何年來二即次第成就坐見宜家之慶晚  
景滋味可想得矣聞李氏家終祥不遠而因山前似  
不得依禮變制為之悲念也沐沐居然作七十篇老翁  
惟當符到便行而所悼者畢竟為無聞之鬼奈何正初  
偶得一疾沉苦四十餘日而尚未撤衾漸綴精力奄奄  
若泉下人不知何時復起為人也吾黨氣象極令人憤



憤事在鄙鄉而不能自鄙鄉鎮定至於延及一道轉轉  
風色安貼無期此何光景言其大風之隧則空谷卽鄙  
鄉耳爲鄙鄉之老者將何顏面復對道內章甫也老物  
之一生藏拙妙策蓋是閉戶二字而嗟乎十年墮佛之  
工一朝壞了不量已分妄效纓冠之義輒致顛躓未免  
出沒於疑謗喧逐之中自岸上人視之謂之以何如也  
自此更欲杜門庶幾爲息黥補劓之計而朋友諸人引  
勉以保和之責賢者書亦箴誨憂歎之不已感愧交至  
不覺汗發背沾衣也然近來種種舉措果雖有不滿人  
意處而同室事終當歸一朋友之間雖或有憂歎反覆



之書而本無相激疑阻之端今此所示恐是聽聞之誤而憂歎之亦太過耳今夫水激而揚之或至過潁而順其勢而疏濬之則自當有浪息安流之日以是靜俟矣

答黃孟耕

華老

次野

嚴老

叔璜

潘老

積久阻濶餘昆季聯牘意外惠垂未復欣瀉不覺頽襟頓滌仍審伏熱從姑母體中調將節不至大損天和八耄篤老之境獲此小康莫非僉從氏誠愛攸致慰賀何可言喻矧惟棣床湛樂加以征邁講究溫理近日見得益復精浚尤爲之區區不已也內再從一旬間疊出堂內兩喪種種慘憐光景不欲煩聞而自家昏憤漸瘁狀



當暑倍甚漸覺符到已近但當坐而待之耳俯詢滿紙  
辭意反覆論理諭責備至自顧愧懼無以爲辭聖人以  
言及之而不言謂之隱向於道院文字不敢附尾者優  
是言及之而不言以僉從氏相愛之至顧安得無疑於  
隱情乎雖然合下寡護之見燭理未明析義未精凡於  
尋常少議論猶不能斷以已見痛快分別故恆念疑事  
毋質之戒十餘年閉戶謝病不干鄉黨間大小事者此  
也況乎斯文上莫重莫大之禮乎大抵後學所以尊奉  
先輩之道當以世代爲定者不但沙翁雜錄所載爲然  
老先生答廷鳳士林書可考也而此則據以經禮而言



也以大體言之則近百年世代懸隔之間位次之失其序者實有所大未安以裏面節拍言之則百餘年已安之位一朝遷動遽爾易次者亦有所大未安以此以彼安得免大未安之端乎苟非大見識極精到習於經典之禮者自難得執兩端而折衷之以及於不偏不倚無過不及之地如此物之昏昧迷陋者固何敢容易妄論以自犯於這那邊大未安之科耶向日之所含默無言者只恐其未安而止非隱情也諒恕如何貴門之單果已發耶如此重大公議論不可無商確一鄉務歸至當之地則其在重事體之道當自院任發稟而子孫之私



自發單恐或不然未知盛意如何既有所問故略陳迷執

答金君益

濟默

歲色與齒俱暮殘緒政自蕭條意外惠訊忽及此際奉復欣感頓若春氣先到因審窮臘靜養起居珍衛杜門看書想有無窮意味閒中真樂孰過於此仰慰且羨沐浴衰短精力日益昏憤應接送迎之撓亦不能斷卻殘書之未遮眼久矣夕死已迫朝聞無望懼哉奈何數條俯詢實非如弟蒙昧者所可議到處未知何以臆對也愚山翁所論七情分屬四端之說前未面對審辯不敢



強說別廟不遷之節既無經禮之可據又無先儒之定論近來嶺中古家多行此節鄙家亦未免從俗而自不得無疑然第念世之別廟之禮蓋爲其各家入享先祖而設者也士林則百世崇奉而爲子孫者遽爾埋安情有所未忍家廟不遷亦有所不敢義起亦無於禮之禮而爲此權宜之道者也若以徇照而言則影堂之享世祠之奉皆此類也原其情理都歸於民俗歸厚之義則昏陋鄙見固何敢遽以爲是而亦未敢遽以爲非未知兄之俯問有所的見真得而然耶抑偶然而發耶道院講錄錄者時未成帙若得見則當轉致床下耳



答朴定于

自兄八山相望益落落兩得新洞優而未承一字悵惘  
懷想只令人憧憧不已旱炎孔熾大界成爐未審隔世  
雲林獨免於焦火之中閑居起居日有適軸之樂否山  
深地僻囂塵不到對案靜坐翫誦探討之工復益精進  
不但幽人貞吉之美而已爲之美歎不已然斯世不必  
果忘先廬不可永謝似當有故里往來之行而峽磴險  
絕不用馬至於四十里云杖屨之勞何以能堪古聞姑  
射仙人倬約如處子云靜界棲身如密室藏火自當使  
精神長旺身體清健以是仰祝沐洙祝融氣焰偏凌衰



骨至於抵當不得狂叫廢啗素苦阿睹添歎無常或至  
開合不得亦不得將此餘日付之殘編自憐奈何天旱  
甚於甲寅有生民盡劉之象豈但一家一己之憂耶遙  
念枕下山溜或能去作人間雨而物外田園不甚受災  
耶

與朴定于

仲冬兒歸後消息更漠然未審閒居學味近復何如地  
僻人稀案上觀玩之工益有自得妙處而澗阿考槃之  
樂必永夫不告只自悵然遐思欲從不得耳初聞入山  
時謂不必遯世長往聽得兒子所報則峽裏田園大致



登嵇山水之樂漁樵之美真是壺中別天地云非不欲  
奮身飛往追躡清塵乞分華山一半而顧此塵臼中入  
安能辦奇異事超然作世外高蹤耶明春間若圖一驢  
則擬從竹院因理一葉漁艇溯桃花流水而第又恐不  
辨仙源何處尋也向日聞與兒子約將作鄙處之行而  
風寒巧發因而寢行云抑山靈爲挽行轅故作風寒耶  
極令人悵恨沐沐終日憤憤只作粥飯翁而近來阿睹  
倍苦亦不無種種憂惱事案頭古紙塵浹數寸雖願朝  
聞而夕死豈可得乎

答鄭孟潤

灝



新春又見新月比吳州之遠則可謂室邇人遐瞻悵倍切乞君來仍奉拜惠書就審正元靜裏起居晏安重屋子新成室家滋味種種可樂明窓閒几足以對越聖賢爲之奉賀不已乞君相握於積阻之餘其喜不可言而言談舉止比前尤醞籍可知前冬所業不至浪過而連值撓惱恨不得細叩其中也沐洙素性不善於攝養雖強加巾櫛然痰嗽流矢等醜症去益難堪精神筋力去益銷脫自知不久於世奈何近始先隴碣役凡百駭擾之端不一而足亦一悶事亞庭書中有俯囑事而顧此荒耗蔑劣實非其人勤教之下未免違傲不勝悚然鄙見



則所永碣文文體簡嚴記行亦詳備後人之文必不如  
古文以是登刻別爲小誌以子孫中年長者名書填之  
不害爲鄭重之道未知如何

與宗人參判

晉利

諸宗雖散而爲萬殊其初卽一本每念同根之誼不覺  
親愛油然而伏惟仲春尊履動止神衛萬相竊念執事本  
以世祿舊家昆季三賢又聯登桂籍順風鴻羽必不待  
安排推轉之力區區冀仰之忱自不能已也宗末衰瘡  
殘痺只有生無益死無損之歎而已更何足遠聞年來  
注書櫛拜執事歸盛道款睦之意無異至親方收得京



鄉先代狀碣合成一部書又虛一卷子以待尚州派文字云此意甚盛凡人家服盡則親盡親盡則疎遠或至視之如行路而惟執事視遠族如一堂至有遍搜諸宗文字考審其各派行蹟之計若推廣此心也能親親而仁民仁民而愛物自家分量內已容得廣廈千萬間大庇氣象矣第恨鄙宗等老甚未及見前面事業之如何耳年來鄙中諸族喪禍荐疊注書又丁其大人憂各在震剝中近始收輯諸家所藏編成一冊因會行便付呈而鄉居之族窮而在下無竹帛輝映之蹟只是家庭間孝謹笏遜之行而已別無可以聳動人聽聞者然執事



之所欲審者必在於躬行踐實處故各派諸先輩幽潛  
之德謹採舊遠先蹟二十四篇仰備清覽近世以下又  
非無問學之工立朝之業而公私間文字之已成者亦  
至十數篇然執事編書凡例姑未得詳知不敢輕自錄  
呈諒之如何

又

一書往復已是數年前事落落相望第切憧憧之忱卽  
茲春寒伏惟仕履棣床起居珍重征邁工夫益復進修  
以究遠大之業耶經幄儒臣職在論思以堯舜君民之  
道日陳於吾君之前以盡啓沃之責如何宗末癘殘毫



庠之狀俱無足可挽而向時書末聯名之數老奮作千  
古人其餘亦次第事符到便行之外更何可喻鄙處各  
派狀碣初不知貴冊凡例前者只以久遠文字書呈矣  
回教以無論近代公私文字並爲修送之意俯示而前  
後門少進拜時又示冊樣以爲蒐輯合錄之地此意甚  
盛且偉矣諸宗感歎之私已無可喻而若推此心以往  
必能視天下如一家其於從政乎何有况顯微閭幽自  
是君子盛德實令人欽歎不已謹因計偕便書上合二  
冊凡五十二篇鄉野儒士之狀別無功名事業之赫然  
著外者而惟是家庭日用道理而已果於異日者有錢



梓之舉得以傳布於一宗之間則豈非執事之能事而  
諸宗之大幸耶今之所呈者私文字居多恐非傳世信  
筆若得公文字自當從後更呈相換以書亦或無妨耶  
前所奉呈一冊還送亦如何

答尹方伯

光顏

去歲下問已是意外而今又降屈威尊特賜俯訊顧此  
窮窳老生只一寡昧蔑劣之物未知執事何所聞而曲  
施下士之禮至此也悄怛戰縮不覺愧汗沾身謹伏審  
仲夏台體起居候對時萬相沐沐瘡痍荒耗百態皆醜  
何敢仰溷崇聽節筮盛儀實非寒士之所敢當禮者而



只感其穆如清風遍及於野氓未暇審擇於辭受之分  
又此恬然奉受其人可俯諒矣天旱此酷食土者之憂  
已無可喻而責當方面之寄者安得不倍費心力耶爲  
之伏憫無已

與朴處仁

冬令猝酷於小溫之餘未審茲辰靜履起居得無所損  
沐洙自秋冬捧心擁頰無日不叫冰嗽風奈何遙想今  
日之席親朋多集爲兄新賓者卽弟懿戚若以一驢馱  
進當作意中之會而第恨此身脫不得憂患窠中竟失  
一日團圓未知兄孔嘉新情亦能念此瑣瑣舊姻耶好



笑歲暮懷事殊覺鬱鬱海山快遊之心日來滔滔而其  
於出無驢何兄家櫪上風驟足可以載瘦翁而踏蓬島  
幸數旬惠借助辦拙者壯遊則吾兄風致亦當可見歸  
日將以雙袖拾來海上風烟以供兄卧遊之資於兄抑  
豈無所得耶亦好笑來正初四與希從約行初二三間  
使一僮牽送則其幸尤何如也

與權文瑞

聖翊

年來老荒無比自斷於此世已久矣朝夕粥飯外別無  
可欲惟朋從之思常憧憧不已而盍簪無緣書墨聯翩  
猶可爲次面一道而措病眸作數字亦不得容易日前



家弟進去而未伸候儀方悚恨而已不意尚爲老兄盛  
度所包容辱垂先施惠存奉復感荷無以爲謝因審霜  
寒靜養動止對時衛重篤老之不至委頓床第固幸矣  
一肢酸疼雖小妨起居若靜處溫室高枕舒膝則自當  
有勿藥之效以是區區沐沐筋力凡百日消月下老人  
醜態無所不見問里間小運動輒喘喘食飲間小失隔  
輒闕滯俱是不好消息安能久於世耶此固理也不須  
爲恨但七十年所業只做得是非叢中可笑一物而桑  
榆之功亦無一分見收悼歎奈何吾輩所事惟與村秀  
才及子孫輩尋行數墨得見多少進就者自是一樂而



如翁則膝下尚無一髻孫前頭之望斷矣每念老兄家  
秀才名孫有聲於曹類間爲之健羨不已令孫識博而  
才高幸使加意進學卒成大儒如何如何聞朴寢郎兄  
病症完復未易朋儕之慮自不淺矣惟願千萬保重以  
副此老友之望也

與高吉心

悃

尚記十二歲時有碩德丈人自湖南歷枉弊廬時在祖  
考側親親相對娓娓各記先誼知有兩家世好而五十  
年間人事變遷聲息落落不知德門遺嗣定住何處爲  
省老病姑母適到表弟柳君縣衙復接清揚妙少奉閱



橐中遺帖則鄒家三代名諱皆在卷中而向時碩德丈人於尊兄爲先府妙少卽尊兄家寶樹也上而蒼髮韶顏宛然如昨日下而端謹儀容藹然可愛雖未承老兄雅面若可以想得來典刑一愴一欣正覺所得不少於今行細叩起居節有閒齋養靜之樂吾輩暮年清福莫如閉戶自適爲之奉慰不已沐洙科曰小伎倆枉了一生而卒無所成朝聞旣幾夕死又迫撫躬悼歎狀不足遠聞聞尊齒長於弟二歲賢允少家豚一年父子之齒俱是不相踰者世世子孫正合續講先分而山川伊阻面目難接奈何情牘無物表贈謹以言忠行篤課農勸



耕八字替作伴簡資區區所貢亦出契分之意諒之如何

答權性豪

豪

去年春夏間兩緘珍墨不知自何轉轉忽墜於杜戶吟  
伏之中顛倒披幅乃甲子十月廿六日所寄也其時出  
已經年承書後又周二歲向來從容數宵之晤便若一  
場夢境而近日凡百動靜無緣更聞矣每南望悵悵只  
有山川阻碍之歎而已卽於意外高友惟彥辛勤迺訪  
驚喜握敘之餘因問賢兄安否則逢著在八月間而仲  
時承養歡迫學味冲裕雖非近信稍慰遐矚之思卽茲



歲色垂暮三餘之工想益懋而益進矣因念賢者資性之雅謹志向之敦篤實非今世俗儒輩輕浮紛汨貌樣區區傾嚮之意不淺淺而期待遠大之望亦自不少果能及此未暮十分努力使進修工夫無或有間斷作輟之患否前書中有明春再顧之示而此期已再逝矣遠地勤勤固知非容易事而惟冀早晚踐約未知此老未死之前或可以復奉英眄耶不覺殘緒悄然老拙四五年來精神筋力日消月鑠昏昏憤憤與賢者所見時頗異家仲宿苦去益沉痼俱不足仰浼遠聽惟以晝夜聯床得盡其天倫之樂爲暮年一幸事耳鄙鄉間近年氣



象賢或聞之否一生閉戶自謂藏拙妙法而猶不免虎  
食其外之歎前春間貴道聲罪之章專討此老一身賢  
必始而驚中而疑終有所不能釋然者矣自顧愧懼方  
內省不暇而平日言行苟或一分見信於朋友間則豈  
至於此耶只自背汗面駢而已謹修一書納之高友袖  
中必無浮沉之慮而但聞相去稍間不知何時可到清  
案耳向年所訊於伯仲爲各幅而所懷別無異同故聯  
名仰復簡率甚矣或可恕諒耶

與近岳會中

春煦載陽花事爛漫伏惟僉履起居與物同春疏省老



兄果出副多士之望僉旆趁期齊臨耶今此瀝血之舉寔出於秉彛所同吾南幾十年抱持之義理當此賊臣壽張之日沐浴聲討之請烏可已乎李寢郎之絕島孤囚極可憐憫而當者猶含笑受罪山南七十州俱是島中之鬼豈可曰在家安處乎沐洙亦於此義理自謂不下於人而老且病矣末由從事於僉君子之後疏行經過鄙境而又不得躬進會所寅餞裂裳之行耗瘡筋力雖或爲僉兄所曲恕而此心缺恨可勝喻哉仍念成文秉執素剛料量精詳今行誠得矣何患大事之不濟但機危而事重緩急操縱必須十分鄭重如何如何製疏



何等重事而迷豚之名亦在備數之末一道之責不敢  
以不文辭免故謹此代草以呈而野人眼目本不諳疏  
章體例一字一句無非慎重詳審處故亦不敢任意下  
筆拙澀如此此草則決不堪用道內諸作必齊到䟽首  
丈自有好文以是不憂耳承弟所帶名色尤異他仕渠  
且素有秉執豈欲落後而但營緬禮已破墓卜日矣亦  
不得廢私爲公未得馳進會末此與託事謀避有異特  
恕如何

答李聖俞

堯臣

儀禮圖中庠門內有一碑字別無註解似是古之庠制



必立一碑於從階及門之半以爲中間肅揖之界而今  
之庠門則元無立碑事古今異制則不必強解少節故  
修定冊子時闕而不書者以此也古制如欲盡追則以  
數尺木碑立之中庭以代古碑無妨耶脯脩每薦橫者  
五挺又以半挺直也縱加其上而此亦冊子中闕遺故夏  
及之耳賓主酬酢他本或多省節處而此是初筵大節  
目則似當一依圖式旅酬以下之載於經文者極煩故  
中山本未免省畧樂工獻爵之節中山本又爲全廢蓋  
以賤工故也而三爵之一旣是爲樂工備設者則似不  
可全廢代獻於樂正以示存羊之義似無妨故冊子中



已詳說此等諸般儀文稟于長老如何

答鄭東翰

萊成

祥事之過期未行只以殯在同宮之故而尊閣裏禮旣以來初過行則卒哭後卽爲卜日追行於禮意似無未安矣禫事則來月本是禫月雖一月之內先行祥事又以下丁或月盡之日行禫事恐未必退行於四月未知哀意如何

答柳敬夫

棧

每向貴邊諸益區區一忱未嘗不憧憧往來而病眸書字甚艱恨未得討一便致意頃因循從歸獲拜意外寵



訊三復以還令人如夢得醒因審其時大碩人體度連  
在攝養中兄履亦不健貢慮不已屬當殘暑向息新涼  
轉生伏惟省况節宣上堂歡愉對案溫理自有無窮好  
意味爲之慰賀敬明寃逝吾黨如此佳少年豈復易得  
耶其大人公失此賢子何以爲懷聞人理極處能強力  
排遣與人酬酢如平日云此固朋友之素期望者而但  
恐制於外者或不覺內傷之患如兄輩者左右慰譬使  
此友無犯西河之戒如何沐洙杜門謝事別無役心於  
外物者而但早晚粥飯外終日無用心正所謂難矣哉  
有何向賢友道者子曰四十五十而無聞者終亦無聞



也已况七十而無聞者乎竊計吾兄年齡雖向衰而比  
沐洙則前頭之可用力者亦多日月且倘多強輔何不  
勉爲孜孜日進高明之域自道之辭有若如沐洙垂老  
者慨然無及之歎也今之學者或多忽於卑近而必口  
談天人性命之理恐或非程夫子所謂自灑掃應對以  
上者也未知如何顧此一生病痛在於心塵每有樂渾  
厭分之患故終是安於卑下言語之間未免露出此意  
想一笑矣但書面及書中遣意假借太過有若待之以  
先進者然此則沐洙所不能安心者而在兄愛人以德  
之義亦不當如是也此後則幸絕去此等文字時惠德



音輒賜箴規以爲朋友切偲之資甚所區區道院講會  
春間之虛過者只以儒生之奔汨科場故也秋科亦不  
無相妨故以九月念間設行計將因來朔香禮時任員  
齊會欲爲發通而姑未與洞主往復洞主若有故似當  
有進退耳倡導後生決非沐洙之所堪而不敢固辭者  
專恃樗翁之來臨要爲尸坐聽讀之計此計已左矣似  
此聾聵之物獨坐將奈何兄及子高輩必爲貴叅左右  
扶掖使老友無至無聊切望

與李胤祖

趾煥

祧遷之禮是人家莫大之事而如此變禮中變節實非



如沐洙謏蔑昧昧者所可容喙欲考見禮說則書用巧  
恒散盡臆見終始疑晦未得合當道理奈何大抵以次  
序言之則俟得當室孤孫之成立依禮改題然後當行  
祧遷而定日已迫勢難中止是一變節也仍舊題祧遷  
則又是未安之一節將改題祧位則以作故人傍題尤  
是大未安之一節節節皆變稱停不得苟非據經達權  
者終難得宜未知何以爲之聞主面粉字未至脫盡云  
以數字剝落改題極似重難無已則姑存舊題奉安別  
祠待孤孫成長改題之時長房具由告祠以高祖考改  
書而傍題則闕書雖未安與其追書公人名字似或愈



焉未知如何鄙家小宗亦有此等變禮方以曾孫傍題  
奉安於祧祠其時沐洙亦年少未得記識於先父兄敦  
定之議而此必有所極難處大未安事故也然此不過  
鄙家一時權行之事則亦不必以此爲證於他人大事  
望須特詢於知禮處俾無誤錯如何如何告辭草呈而  
若無祧位改題之所則似不必別告於新位自宗孫之  
高祖以下列書至考位而合告如何無所考據處只以  
賤說臆對或恐自誤以誤人悚憫無已







